

Komisija za očuvanje nacionalnih spomenika, na osnovi člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 21. do 27. januara 2003. godine, donijela je

## ODLUKU

### I

Historijska građevina **Most u Klepcima**, proglašava se nacionalnim spomenikom Bosne i Hercegovine (u daljem tekstu: nacionalni spomenik).

Nacionalni spomenik nalazi se na teritoriju općine Čapljina, Federacija Bosne i Hercegovine.

Na nacionalni spomenik primjenjuju se mjere zaštite i rehabilitacije utvrđene Zakonom o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH", br. 2/02 i 27/02).

### II

Vlada Federacije Bosne i Hercegovine (u daljem tekstu: Vlada Federacije) dužna je osigurati pravne, naučne, tehničke, administrativne i finansijske mjere za zaštitu, konzervaciju, prezentaciju i rehabilitaciju nacionalnog spomenika.

Vlada Federacije Bosne i Hercegovine dužna je osigurati sredstva za izradu i provođenje potrebne tehničke dokumentacije za rehabilitaciju nacionalnog spomenika.

Komisija za očuvanje nacionalnih spomenika (u daljem tekstu Komisija) utvrdit će tehničke uvjete i osigurati finansijska sredstva za izradu i postavljanje informacione ploče sa osnovnim podacima o spomeniku i odluci o proglašenju dobra nacionalnim spomenikom.

### III

U cilju trajne zaštite dobra utvrđuju se I i II zona zaštite.

**I zona** zaštite obuhvata objekat i pojas u radijusu od 100 metara mjereno od sredine mosta. U ovoj zoni provode se sljedeće mjere zaštite:

- zabrana izvođenja bilo kakvih radova, osim konzervatorsko-restauratorskih, uz odobren projekat od strane federalnog ministarstva nadležnog za prostorno uređenje i stručni nadzor nadležne službe zaštite naslijeđa na razini Federacije Bosne i Hercegovine (u daljem tekstu: nadležna služba zaštite);
- zabrana odlaganja svih vrsta otpada;
- zabrana saobraćaja teških kamiona i građevinskih strojeva;
- zabrana obavljanja svih radova na infrastrukturi osim u izuzetnim slučajevima uz odobrenje federalnog ministarstva nadležnog za prostorno uređenje i stručni nadzor nadležne službe zaštite.

**II zona** zaštite obuhvata pojas u radijusu od 200 metara mjereno od sredine mosta. U ovoj zoni provode se sljedeće mjere zaštite:

- zabrana eksploatiranja kamena i ostalih prirodnih bogatstava;
- zabrana odlaganja svih vrsta otpada;
- zabrana svake izgradnje osim izgradnje poljoprivrednih objekata i to privremenog karaktera;
- zabrana saobraćaja teških kamiona i teških građevinskih strojeva;
- zabrana obavljanja svih djelatnosti koje svojim radom (aero-zagađenje, buka, vibracije) mogu prouzrokovati negativne efekte po zaštićenu cjelinu.

Vlada Federacije dužna je posebno osigurati provođenje sljedećih mjera:  
- obavljanje naučno - istraživačkih radova na mostu u cilju sagledavanja oštećenja i izrade cjelovitog programa sanacije objekta;  
- izradu tehničke dokumentacije za sanaciju objekta u kojoj treba predvidjeti:

- saniranje svoda sa lahke pokretne skele sa čišćenjem spojnica i zapunjavanjem malterom;
- odstranivanje vegetacije sa konstrukcije svoda;
- saniranje parapetnih zidova na lijevoj obali rijeke;
- rekonstruiranje – saniranje hodne konstrukcije mosta;
- pregled i saniranje oporaca mosta;
- saniranje uzvodnih i nizvodnih krilnih zidova;
- saniranje vijenaca mosta;
- rekonstruiranje korkaluka mosta, uz upotrebu originalnog kamena i tradicionalnih veznih elemenata – klamfi, trnova, olova;
- uređenje okoline mosta sa uklanjanjem samonikle vegetacije.

#### IV

Stavljaju se van snage svi provedbeni i razvojni prostorno-planski akti koji su u suprotnosti sa odredbama ove odluke.

#### V

Svako, a posebno nadležni organi Federacije Bosne i Hercegovine, kantona, gradske i općinske službe suzdržat će se od poduzimanja bilo kakvih radnji koje mogu oštetiti nacionalni spomenik ili dovesti u pitanje njegovu zaštitu i rehabilitaciju.

#### VI

Ova odluka dostavit će se Vladi Federacije, federalnom ministarstvu nadležnom za prostorno uređenje, nadležnoj službi zaštite, općinskom organu uprave nadležnom za poslove urbanizma i katastra, radi provođenja mjera utvrđenih u tač. II, III, i IV ove odluke i nadležnom općinskom sudu radi upisa u zemljišne knjige.

#### VII

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim osobama u prostorijama i na web stranici Komisije (<http://www.aneks8komisija.com.ba>).

#### VIII

Prema članu V, stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

#### IX

Ova odluka stupa na snagu danom donošenja i objavit će se u «*Službenom glasniku BiH*» i «*Službenim novinama Federacije BiH*».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Broj: 08.2-6-725/03  
Sarajevo, 21. januara 2003. godine  
Sarajevo

**Predsjedavajući Komisije**

**Dubravko Lovrenović**